

# Promover cumpatibilitad da famiglia e professiun

La regenza refusa ina incumbensa parlamentara da suppleant da deputà Patrik Degiacomi (ps Cuira)

■ (mc) **Cun in'incumbensa parlamentara vuleva deputà Patrik Degiacomi (ps Cuira) incumbensar la regenza d'elavurar in pachet mesiras che promova a moda effizienta la cumpatibilitad da la professiun cun la famiglia. La regenza è bain pronta da coordinar er en l'avegnir las mesiras chantunalas cun las mesiras federalas. Da l'elavuraziun d'in pachet da mesiras chantunal vules ella dentant desister. Ella recumonda al cussegl grond da refusar l'incumbensa.**

Tenor deputà *Patrik Degiacomi* èsi enconuscent bain avunda ch'i mancan sin il martgà la lavur adina dapli persunas spezialisadas e qualificadas. Quai cunzunt pervia da la midada demografica. En il Grischun sa reducescha il dumber da contracts d'emprendissadi marcantamain. Plinavant è il dumber da naschientschas sa reduci per 37% tranter 1992 e 2005. Gia oz na possian bieras plazzas d'emprendissadi en manaschis grischuns betg pli vegnir occupadas. En branschas sco il sector da sanadad discurrin ina gia d'ina mancanza da persunas spezialisadas. Resguardond la cumpart da persunas attempadas daventia questa mancanza adina pli virulenta. Fin ussa sajan las consequenzas vegnidas mitigadas per gronda part tras l'immigraziun da persunas spezialisadas dal spazi europeic. Quai haja dentant betg bastà per ina cumpensaziun en tut las branschas ed i saja sa mussà che l'avertadad dals votants svizzers n'è betg illimitada envers questa immigraziun. Uschia stettia er il Grischun en in cumbat per talents che vegnia ad esser anc pli dir en l'avegnir.

## Cumpatibilitad da famiglia e professiun

«Ina via da success empermettent da success esser quella da procurar per cundi-

ziuns generalas che motiveschan forzas da lavur svizras qualificadas da sa participar al process da lavur», manegia Degiacomi. Bieras dunnas e blers umens bain scolads, che hajan obligaziuns da famiglia, na chattian betg talas cundiziuns. Per els na cunvegna per exempel simplamain betg da lavurar u d'augmentar lur pensum da lavur, u els na chattan naginas purschidas da la tgira d'uffants durant las vacanzas da scola.

L'iniziativa per dapli personal qualificatgà da la confederaziun e da la CdC (Conferenza da las regenzas chantunalas) cuntegna tranter auter sco punct central la promoziun d'ina meglra cumpatibilitad da la professiun cun la famiglia. Biers chantuns realiseschan las mesiras recumandadas u fan – sco Basilea (spazi economic favuraivel per familias) u Lucerna – anc in ulterior pass. Ils chantuns Turitg e Basilea han plinavant fatg studis ed han per exempel concludi mesiras per eliminar fauss impuls tar las taglias, tar las prestaziuns socialas dependentas dal basegn sco er tar ils sistems tariffars da la tgira d'uffants complementara a la famiglia ed a la scola. En il chantun Berna per exempel subvenziunescha il chantun la tgira d'uffants cun 80%. En il chantun Grischun percunter vegnan circa 60% dals custs totals da la tgira d'uffants finanziads dals geniturs sur las tariffas. Sco lieu economic ha il Grischun dischavantatgs envers auters spazis economics svizzers.

«Mo sch'il Grischun ha ina plazza a la testa en la concorrenza economica per talents cun obligaziuns da famiglia avain nus ina schanza da metter a disposiziun a nosa economia quellas forzas da lavur ch'ella dovra per avair in success duraivel», argu-mentescha Degiacomi.



Suppleant da deputà Patrik Degiacomi (ps Cuira). MAD

## La regenza è cunscenta da la mancanza smanatschanta

Da la mancanza smanatschanta da persunas spezialisadas è la regenza cunscenta. La confederaziun ha lantschà l'onn 2011 ina iniziativa per dapli personal qualificatgà; en il rom da quella ha il cussegl federal approvà l'onn 2013 in pachet da mesiras. Ultra da la tematica da la cumpatibilitad da la professiun cun la famiglia, che vegn focusada en l'incumbensa, definescha quest pachet trais ulteriurs champs d'acziun: la qualificaziun superiura, l'activitad da gudogn da lavurants e lavurants pli vegls e la promoziun d'innovaziuns. Potenzials nuduvrats per eliminar la mancanza da persunas spezialisadas e per trair a niz meglia

il potenzial da forzas da lavur svizras na vegnan betg mo localisads tar las dunnas, mabain er tar ils giuvenils, tar las persunas pli veglias e tar las persunas cun impediments. Il chantun sustegna questa iniziativa tras quai ch'el pussibilitescha a persunas cun experientscha professiunala, ma senza emprim diplom professiunala, da sa qualificar professiunalmain ordaifer las vias da scolaziun regularas. El surpiglia er ina gronda part dals custs da questas qualificaziuns posteriuras. Plinavant sustegna la confederaziun la creaziun da novas purschidas tras agids finanziels per la tgira d'uffants complementara a la famiglia ed a la scola. Quellas scadan previsiblmain l'onn 2019. En il rom d'ina basa legala da durada limitada planisescha la confederaziun da stgaffir impuls per ch'ils chantuns, las vischnancas ed eventualmain ils patrunds investeschian dapli en la tgira d'uffants complementara a la famiglia per uschia promover vinavant la cumpatibilitad da la professiun cun la famiglia. En sia resposta da consultaziun ha la regenza beneventà da princip la proposta dal cussegl federal. Ella è dentant da l'avis ch'ina finanziaziun d'impuls da durada limitada na possa purtar nagin effect duraivel. Perquai duess la confederaziun sa participar er vinavant cun ina tariffa da contribuziun fixa als custs per la tgira d'uffants complementara a la famiglia. Il cussegl grond ha relaschà gia l'onn 2003 ina lescha davart la promoziun da la tgira d'uffants complementara a la famiglia. Gia quella giada eri evident ch'il dumber da persunas spezialisadas vegnia a sa sbassar en consequenza dal svilup demografic.

L'onn 2007 èn vegnidas preschentadas e priorisadas en il rom dal rapport grischun da famiglia (missiva carnet nr. 15

2006–2007) differentas mesiras da la politica da famiglia (p. ex. augment da la tariffa da contribuziun per la tgira d'uffants complementara a la famiglia, calculaziun dals custs normads, directives per concepir las tariffas, introducziun d'instrucziun en bloc, purschidas da structures dal di, tgira durant las uras marginalas, distgargias fiscalas e.u.v.). Uschenavant ch'ellas tutgan al champ da cumpetenza dal chantun èn ellas vegnidas realisadas. En il sector da las taglias èn p. ex. las deducziuns per uffants vegnidas auzadas massivamain (onn 2006: 2400 francs; oz: 6000 francs per uffants da la vegliadetgna prescolara, 9000 francs per uffants minorens u per uffants en scolaziun resp. 18000 francs per uffants en scolaziun ordaifer). Plinavant è vegnida introducida ina deducziun per la tgira d'uffants: Per uffants fin a la cumplecida dal 14. onn da vegliadetgna pon vegnir deducids custs da tgira tras terzas persunas fin 10000 francs. Tar ils conjugals evitescha l'uschenumnà splitting parzial ch'i resulta ina chargia fiscala pli gronda cumpareglià cun pèrs en concubinad. Ina clera extensiuon da la purschida da tgira per uffants obligads d'ir a scola hai dà a partir da l'onn da scola 2013/14 tras la revisiun totala da la lescha da scola cun l'introducziun da l'instrucziun en bloc sco er da structures dal di per la tgira.

La regenza renconuscha l'importanza da la cumpatibilitad da la professiun cun la famiglia sco er il return facilità en la vita professiunala, en spezial per motivs da l'atractivitad dal lieu sco spazi d'abitar, da lavurar e da viver e pervia dal basegn da personal qualificatgà. In pachet da mesiras separà n'è betg necessari ord vista da la regenza, meglieraziuns duain vegnir fatgas en singuls puncts.